

Peralihan ke endemik: Masyarakat perlu bertanggungjawab, jujur

Oleh [Noor Atiqah Sulaiman](#) - Mac 26, 2022 @ 2:08pm
bhnews@bh.com.my



Kos ujian sendiri lebih murah bertujuan memudahkan masyarakat untuk masuk ke Fasa Peralihan Endemik. - Foto hiasan NSTP

PUTRAJAYA: Rakyat di negara ini hanya boleh memasuki Fasa Endemik sekiranya mereka bertanggungjawab serta jujur termasuklah tidak menipu keputusan ujian kit saringan pantas (RTK) antigen bagi mendapatkan 'cuti percuma'.

Menteri Kesihatan, Khairy Jamaluddin, berkata masyarakat tidak boleh bergantung kepada kerajaan semata-mata dalam isu penguatkuasaan, sebaliknya tugas berkenaan perlu dipikul bersama.

Disebabkan itu, Khairy berkata kerajaan memudahkan masyarakat dengan hanya melaporkan ujian sendiri berkenaan dalam MySejahtera tanpa memerlukan mereka membuat saringan profesional.

"Bila sudah memasuki Fasa Peralihan Endemik kita perlu bergantung kepada solidariti dalam komuniti. Jika kita nak syaratkan (majikan) untuk mengiktiraf individu berkenaan sebagai positif COVID-19 dengan hanya keputusan saringan seca profesional, ia memerlukan kos yang tinggi.

"Sebab itu kita minta mereka membuat ujian sendiri dan kosnya lebih murah tidak sampai RM10, keputusan ini untuk memudahkan masyarakat untuk masuk ke Fasa Peralihan Endemik.

"Tak mungkin semua perkara kerajaan perlu pantau, nak kena buat penguatkuasaan kompaun atau denda. Jadi saya merayu kepada rakyat Malaysia bila kita sudah beri tanggungjawab ini kepada anda iaitu dengan membuat ujian sendiri, anda mestilah jujur.

"Jangan semata-mata nak ponteng kerja, pergi laporkan keputusan positif palsu, ini adalah satu tindakan yang tidak bertanggungjawab," katanya selepas Majlis Pelancaran Malaysian Community Health Agent (MyCHAMPION) Peringkat Kebangsaan, di Sepang, hari ini.

Kelmarin BH melaporkan penipuan keputusan RTK antigen untuk mendapat 'cuti percuma' perlu dibendung lebih awal, sebelum ia menjadi budaya atau kebiasaan di tempat kerja.

Presiden Persatuan Keselamatan dan Kesihatan Pekerjaan Malaysia (MSOSH), Dr Shawaludin Husin berkata tindakan tidak bertanggungjawab itu didapati berlaku kerana prosedur saringan adalah mudah dan longgar, yang mana pekerja hanya perlu melaporkan keputusan RTK antigen dalam aplikasi MySejahtera serta memaklukkannya kepada majikan.

Dalam pada itu, Khairy memaklumkan sekiranya majikan berkenaan meminta pekerjaanya membuat ujian profesional serta didapati pekerja berkenaan menipu, tindakan undang-undang boleh diambil.



Khairy (tengah) bersama sukarelawan pada majlis pelancaran 'MyCHAMPION - Community Health Agent' Peringkat Kebangsaan 2022 hari ini. Turut hadir Timbalan Ketua Pengarah Kesihatan (Kesihatan Awam), Datuk Dr Chong Chee Kheong (kiri).

"Kalau nasib tak baik dan 'kantoi' kita boleh ambil tindakan undang-undang kerana adalah menjadi satu kesalahan salah lapor pada aplikasi MySejahtera," katanya.

Khairy berkata, disebabkan ada pihak tidak bertanggungjawab, beliau terpaksa meneliti semula kelonggaran syarat untuk memendekkan tempoh isolasi bagi kes positif COVID-19.

"Sekarang tempoh isolasi adalah tujuh hari, ada cadangan yang diberikan bahawa sekiranya individu berkenaan membuat ujian saringan sendiri pada hari kelima dan keputusannya negatif, jadi individu berkenaan sudah tidak perlu menjalani kuarantin dalam tempoh yang ditetapkan.

"Namun keputusan itu tidak dapat diputuskan lagi, sebab saya risau terjadinya kes penipuan seperti ini. Saya percaya bila masyarakat sudah mula boleh dipercayai kita akan umumkan syarat berkenaan," katanya.

Dalam perkembangan lain, Khairy berkata berkemungkinan Malaysia juga akan menjalani kajian sama ada plastik kini berada dalam sistem darah manusia seperti yang dilaporkan oleh saintis Belanda.

"Saya terkejut dengan dapatan kajian saintis Belanda ini, jadi saya akan bangkitkan isu ini kepada Institut Pendidikan Kesihatan dan mungkin kita akan buat kajian berkenaan di negara ini," katanya.

Terdahulu, Khairy dalam ucapannya memaklumkan saintis di Belanda melaksanakan kajian terhadap 22 individu dan menerusi sampel darah yang diberikan, dapatan mendapati 80 peratus daripadanya mempunyai kandungan microplastik dalam darah mereka.

Antara kandungan microplastik itu termasuklah jenis plastik yang digunakan untuk botol air mineral serta bekas polisterin. Kandungan plastik dalam darah berkenaan disebabkan penggunaan plastik yang berleluasa sehingga memberi kesan kepada jangka hayat dan kesihatan.